

共下來講師傅話

合：七早八早大家早，

早早䟽床精神好，

精神好、讀書好，

考試一定無煩惱呀無煩惱！

大家好，

阿滿仔：佢係阿滿仔，

阿嬌仔：佢係阿嬌仔，

合：上台一鞠躬！

阿滿仔：（打呵欠、伸懶腰）阿嬌姐，恁會早！

阿嬌仔：那有早，日頭曬屎肱囉！

老古人言：早䟽三朝當一工，早䟽三年當一冬，

你恁樣睡晝晝，做事情仰會成功？

阿滿仔：（敗勢个樣仔）昨暗晡趕夜車咩！

阿嬌仔：麼个呀！你這隻懶尸嫲，愛開學了，敢係若个作業

盲做好？

阿滿仔：係……係啦！

阿嬌仔：你噢！屎出正來挖糞窖，仰赴得掣？

阿滿仔：佢知了啦！下二擺定著毋會過推懶了啦！

阿嬌仔：無該你來講看阿，放寮日你到底做了麼个事？

阿滿仔：講到這，佢就又有精神了，歇奈个時節，吾爸渡佢

撈老弟轉莊下阿公、阿婆个屋下。

阿嬌仔：該一定係盡生趣个所在喔！

阿滿仔：係呀！吾公个屋係一間大伙房，屋面前係濶濶个禾
埕。

屋脣有田、陂塘，屋下畜有盡多个「畜牲」，還
有.....

阿嬌仔：麼个呀～你仰講若公屋下个人係「畜牲」呀？

阿滿仔：無係啦！佢講个係該兜雞仔、豬仔啦！

阿嬌仔：雞仔、豬仔？

阿滿仔：該雞仔、豬仔毋就係「畜牲」咩！

阿嬌仔：喔～係啦！毋過^ㄟ兜畜雞仔、畜豬仔，愛講「畜頭
牲」，

「畜牲」係罵人个話，毋好儘採講，知無！

阿滿仔：喔！佢知咧！

阿嬌仔：你這擺轉去莊下，客家話係毋係有進步了？

阿滿仔：有啊！吾公教佢盡多个師傅話喔！誒～無^ㄟ兩儕就
來比賽看啊！看麼人較慶？

阿嬌仔：你喔～毋好食了三粒黃豆仔，就想愛上西天！

看你沙鼻弄天恁有自信！^ㄟ就來試看哪！

阿滿仔：無問題，阿婆食豆腐，簡單啦！

阿嬌仔：八月半蒸甜靚，

阿滿仔：忒早咧！

阿嬌仔：十二月个甘蔗，

阿滿仔：兩頭甜！

阿嬌仔：三十暗晡个飯甌，

阿滿仔：無閒！

阿嬌仔：哎喔～正經係遮仔無頂，還有拼喔！

阿滿仔：嘿……（當沙鼻个樣仔）

阿嬌仔：好，佢過來問你！十隻雞仔毋見忒九隻，

阿滿仔：唉！恁簡單，毋使想也知，伸一隻！

阿嬌仔：麼个伸一隻，你認真想看仔。

阿滿仔：十隻雞仔減忒九隻，明明就係伸一隻咩！

阿嬌仔：佢攞你講師傅話，無係講數學呢！

阿滿仔：唉……佢認輸了，答案到底係麼个？

阿嬌仔：答案係「一看就知」。

阿滿仔：「一看就知」？

阿嬌仔：著呀！十隻雞仔一大群，少了九隻，該毋係「一看就知」。

阿滿仔：哦～原來係恁樣。

阿嬌仔：毋好大鑊咁滾、細鑊洛洛滾，儘採尋人拚輸贏。

阿滿仔：敗勢啦！頭先佢忒沙鼻了。

阿嬌仔：客家師傅話又安到功夫話，係客家先民在生活當中
累積个智慧，保留了客家最傳統个話語。

阿滿仔：短短仔一二句話，毋單講來搭句，還較有教育个意義喔！

阿嬌仔：就像「飯後行百步，」

阿滿仔：「賣藥先生關藥鋪。」

阿嬌仔：這就係喊人愛運動，正會有砸礮个身體。

阿滿仔：係呀！身體康健了，就毋使食藥仔了。

阿嬌仔：大家共下來講師傅話，分優美个傳統客家文化做得
代代相傳，展現有內涵个客家文化人。

阿滿仔：阿滿仔，

阿嬌仔：阿嬌仔，

合：下台一鞠躬！